

潼关志

一
函
四
册
函

潼關志卷之下

兵畧第八

兵畧

兵畧志武功也關門歷代戰守凡可徵諸史者咸書之

漢獻帝建安十六年三月馬超韓遂等衆十萬屯據潼關七月魏武曹操自將擊之八月至潼關潛遣二將渡蒲坂據河西爲營閏月操北渡河兵衆先渡操獨與虎士百餘人留南岸斷後馬超將步騎萬餘人

攻之矢下如雨操猶據胡床不動許褚扶操下船船
工中流矢死褚左手舉鞍蔽曹右手刺船校尉丁斐
放牛馬以餌賊賊亂取之操乃得渡遂自蒲阪渡西
河循河爲甬道而南超等退拒渭口操乃設疑兵潛
兵入渭作浮橋結營於渭南伏兵擊破之九月進軍
悉渡超等數挑戰不許因計離間遂克日會戰大破
之遂超奔涼州曹追至安定而還諸葛武侯謂操殆
死潼關蓋謂此也

晉安帝義熙十三年三月將軍王鎮惡進軍潼關檀

道濟沈林子自陝北渡河拔襄邑堡攻尹昭於蒲坂
不克秦主泓以東平公紹爲太宰封魯公督將軍姚
鸞等步騎五萬守潼關遣別將姚驢救蒲坂林子謂
道濟曰蒲坂城堅兵多不可猝拔不如還與鎮惡并
力以爭潼關若得之則尹昭不攻自潰矣道濟從之
三月至潼關紹引兵出戰道濟等奮擊大破之紹退
屯定城據險拒守遣姚鸞屯大路絕晉糧道林子夜
襲殺鸞紹又遣東平公讚屯河上以斷水道林子擊
走之七月太尉劉裕至潼關遣王鎮惡帥水軍自河

入渭大破秦兵遂入長安秦主泓出降十二月太尉
裕南還夏主勃勃聞之大喜召王買德問計德曰關
中形勝之地而裕以幼子守之狼狽而歸正欲急成
篡事不暇復以中原爲意此天以關中賜我不可失
也青泥上洛南北之險宜先遣遊軍斷之東塞潼關
絕其水陸之路然後傳檄三輔施以恩德則義真在
網罟之中不足取也勃勃乃使其子璜帥騎二萬向
長安別將屯青泥及潼關自將大軍爲後繼

五
宋元嘉二十七年弘農太守柳元景使薛安都等

大破魏師于陝斬其將張是連提降者二千餘人諸將欲盡殺之元景曰王旗北指當令仁聲先路盡釋而遣之皆稱萬歲而去遂克陝城進攻潼關據之上以王玄謨等敗退魏軍深入元景等不宜獨進皆召還

梁普通五年三月魏秦州莫折大提反陷高平大提死于念生代領其衆七年二月據潼關

北魏孝昌二年春正月魏蕭寶寅反魏遣行臺長孫稚討之寶寅圍馮翊稚軍至弘農左丞楊侃謂稚曰

潼關險要守禦已固不如北取蒲坂渡河而西入其
腹心置兵死地則華山之圍不戰自解潼關之守必
內顧而走支節旣解長安可坐取也稚乃使其子彥
與侃帥兵北渡據石錐壁命送降名者各還村俟臺
軍舉三烽當亦舉烽相應無應烽者乃賊黨也當進
擊屠之以所獲賞軍於是村民轉相告語雖實未降
者亦詐舉烽一宿之間火光遍數百里賊圍城者不
測各散歸薛修義薛鳳賢俱請降稚遂克潼關
六年七月魏大丞相高歡及追魏主至弘農遂攻潼

關克之進屯華陰

十月魏宇文泰攻潼關斬高歡守將薛瑜還長安進位大丞相

東魏元年春正月大行臺尚書司馬子如都督竇泰韓軌等攻潼關宇文泰軍于灊上子如從蒲津宵濟攻華州刺史王熊擊破之

三年春正月東魏高歡遣司徒高敖曹攻上洛大都督竇泰攻潼關自將軍蒲坂造三浮橋欲渡河魏宇文泰擊破之竇泰自殺高歡撤浮橋而退

周大象二年相州總管蜀公尉遲迥舉兵相州討丞相楊堅堅遣韋孝寬將兵討之繼遣楊尙希鎮潼關以拒迥

隋開皇四年六月隋主以渭水多沙深淺不常漕者苦之詔宇文凱鑿渠引渭自大興城東至潼關三百里名廣通渠漕運通利關內賴之 大業九年六月楚公楊元感起兵黎陽帝命宇文述等擊之七月元感引兵西趨潼關宇文述等躡之至弘農宮太守蔡王智積曰元感聞大軍將至欲西圖關中若成其計

則難克也當以計縻之及元感至智積登埤大詈元感怒留攻之李密諫曰軍事貴速况追將至安可稽留若前不得據關退無所守大衆一散何以自全元感不從攻三日不拔乃引而西後果爲追兵所執

義寧元年九月唐公李淵帥諸軍濟河遣世子建成劉文靜等諸軍屯永豐倉守潼關以備東方兵慰撫使竇軌等受其節度十二月屈突通使桑顯和夜襲文靜營文靜悉力苦戰顯和敗走通勢益蹙及聞長安不守乃留顯和鎮潼關引兵將趨洛陽顯和卽以

城降軍人執送長安

唐天寶十四年十一月安祿山反遣封常清如東京募兵禦之常清與賊戰於武牢敗績乃帥餘衆至陝謂高仙芝曰賊鋒不可當且潼關無兵若賊豕突入關則長安危矣不如引兵先據潼關以拒之仙芝乃趨潼關修完守備邊令誠數以事干仙芝不從乃譖仙芝常清于上上大怒卽遣令誠齎勅斬之上以哥舒翰有威名且素與祿山不協召拜兵馬副元帥將兵八萬以討祿山並仙芝舊卒號二十萬軍於潼關

常山太守顏杲卿起兵討賊祿山欲攻潼關至新安
聞河北有變而還十五載正月祿山遣其子慶緒寇
潼關哥舒翰擊却之時祿山議棄洛陽走歸范陽計
未決是時天下以楊國忠驕縱召亂莫不切齒又祿
山起兵以誅國忠爲名王思禮密說哥舒翰使抗表
請誅國忠翰不應思禮又請以三十騎劫取以來至
潼關殺之翰曰如此乃翰反非祿山也或說國忠今
朝廷重兵皆在翰手翰若援旗西指於公豈不危哉
國忠大懼乃奏潼關大軍雖盛而後無繼萬一失利

京師可憂請選監牧小兒三千於苑中訓練又募萬人屯灞上令所親杜乾運將之名爲禦賊實備翰也翰聞亦恐爲國忠所圖乃表請灞上軍隸潼關六月癸未召杜乾運詣闕白事斬之國忠益懼會有告崔乾佑在陝兵不滿四千皆羸弱無備上遣使趣哥舒翰進兵復陝洛翰奏曰祿山久習用兵今始爲逆豈肯無備是必羸師以誘我若往正墮其計中且賊遠來利在速戰官軍據險以阨之利在堅守况賊殘虐失衆兵勢日蹙將有內變因而乘之可不戰擒也要

在成功何必務速今諸道徵兵尙多未集且請待之
郭子儀李光弼亦上言請引兵北取范陽覆其巢穴
質賊黨妻子以招之賊必內潰潼關大軍惟應固守
以蔽之不可輕出國忠疑翰謀已言於上以賊方無
備而翰逗留將失機會上以爲然續遣中使趣之項
背相皇翰不得已撫膺慟哭丙戌引兵出關己丑遇
崔乾佑之軍於靈寶西原乾佑據險以待之南薄山
北阻河隘道七十里庚寅官軍與乾佑會戰乾佑伏
兵於險翰與田良丘浮舟中流以觀勢見乾佑軍少

趣諸軍使進王思禮等將精兵五萬居前龐忠等將
餘兵十萬繼之翰以兵三萬登河北阜望之鳴鼓以
助其勢乾佑所出兵不過萬人什什五五散如列星
或踈或密或前或却官軍望而笑之乾佑嚴精兵陳
于其後兵旣交賊偃旗如欲遁者官軍懈不爲備須
臾伏兵發賊乘高下木石擊殺士卒甚衆道隘士卒
如束槍槩不得用翰以氈車駕馬爲前驅欲以衝賊
日過中東風暴急乾佑以草車數十乘塞氈車之前
縱火焚之煙燄所被官軍不能開目妄自相殺謂賊

在煙中聚弓弩而射之日暮矢盡乃知無賊乾佑遣
同精騎自南山過出官軍之後擊之官軍首尾駭
亂不知所備於是大敗或棄甲竄匿山谷或相擠排
入河溺死囂聲振天地賊乘勝蹙之後軍見前軍敗
皆自潰河北軍望之亦潰瞬息間兩岸皆空翰獨與
麾下百餘騎走自首陽山西渡河入關關外先爲之
塹皆廣二丈深丈人馬墜其中湏臾而滿餘衆踐之
以度士卒得入關者纔八千餘人辛卯乾佑進攻潼
關克之翰至關西驛揭榜收散卒欲復守潼關蕃將

火拔歸仁等以百餘騎圍驛入謂翰曰賊至矣請公
上馬翰上馬出驛歸仁帥衆叩頭曰公以二十萬衆
一戰棄之何面目復見天子且公不見高仙芝封常
清乎請公東行翰不可歸仁以毛縻其足于馬腹及
諸將不從者皆執之以東會賊田乾真已至遂降之
俱送洛陽祿山謂火拔歸仁曰汝叛主不忠不義執
而斬之

唐肅宗至德二載郭子儀引蕃漢兵追賊至潼關斬
首五千級克華陰弘農二郡獻俘百餘人